

每週經課朗誦經文(巴克禮漢羅/教羅)2013/06/02

共同經課 - 1 列王記上十八章二十節~三十九節

20 A-hap 就差人去以色列眾人 hia, 招集 chiah-ê 先知到 Ka-bit 山。21 以利亞就近眾百姓講, Lín 存兩樣心無決斷, beh 到甚麼時 ah? 若耶和華是上帝, 就 tiòh thàn 耶和華; 若 Pa-lèk 是上帝就 tiòh thàn Pa-lèk; 百姓無應一句話。22 以利亞 kā 百姓講, 耶和華 ê 先知, 只有 chhun 我一人, 總是 Pa-lèk ê 先知, 有四百五十人。23 Taⁿ tiòh 用兩隻牛 káng-á hō阮, Pa-lèk ê 先知 thang 為家己揀一隻牛 á, 切 kui 塊, hē tī 柴頂, 下面 m̄-thang lok 火; 我料理 hit 隻牛 á, hē tī 柴頂, 下面也無 lok 火。24 Lín 求叫 lín ê 上帝 ê 名, 我求叫耶和華 ê 名; hit-ê 用火顯應 ê 上帝, 就是上帝。眾百姓應講, chit-ê 話真好。25 以利亞 tùi Pa-lèk ê 先知講, Lín 為家己揀一隻牛 káng-á, 事先料理伊, 因為 lín 人額 khah-choē, lín 求叫 lín 上帝 ê 名, 獨獨 m̄-thang lok 火 tī 下面。26 In 就將所 hō in ê 牛 káng-á 去料理伊; tùi 早起到日晝求叫 Pa-lèk ê 名, 講, Pa-lèk ah, tiòh 聽阮; 總是無聲 seh, 也無應答; in tī 所起 ê 壇, 周圍 tiò 跳。27 到中晝, 以利亞譏刺 in 講, 大聲求叫 lah; 因為伊是上帝, 伊 kiám-chhái 靜靜 teh 想, á 是退去偏僻 ê 所在, á 是行路, á 是 teh 暈, lín tiòh 叫伊醒。28 In 大聲求叫, 照 in ê 例, 用刀用鎗家己割, 致到 in ê 身軀流血。29 Tùi 日過晝到獻 ê-hng 祭 ê 時, in teh 講 in ê 先知話; 總是無聲 seh, 無應答, 也無 chhap in ê。30 以利亞 kā 眾百姓講, Lín 來近 oá 我; 眾百姓就近 oá 伊; 伊就 koh 修理耶和華倒壞 ê 壇。31 以利亞取十二塊石, 照雅各 ê kiáⁿ ê 支派 ê 數額; chit-ê 雅各就是前耶和華 ê 話 bat 臨到伊講, 以色列 beh 做你 ê 名 ê。32 以利亞用 chiah-ê 石頭, 奉耶和華 ê 名, 起一座壇, tī 壇 ê 周圍開溝, 能貯得種子兩 sè-a。33 Koh 排列柴, 將牛 á 切 kui 塊, hē tī 柴頂; 講, lín 用四個桶貯水滿滿, piàⁿ tī 燒祭 kap 柴 ê 頂面; 34 koh 講, Piàⁿ 第二 pái, in 就 piàⁿ 第二 pái; koh 講, Piàⁿ 第三 pái; in 就 piàⁿ 第三 pái; 35 水流 tī 壇 ê 四圍, 溝也有水滿滿。36 到獻 ê-hng 祭 ê 時, 先知以利亞近前來, 講, 亞伯拉罕、以撒, 以色列 ê 上帝耶和華 ah, 求你今 á 日 hō 人知你 tī 以色列做上帝, 也知我是你 ê 奴僕, koh 是照你 ê 話來行這一切 ê 事。37 耶和華 ah, tiòh 聽我; tiòh 聽我, hō chit 國 ê 百姓知你耶和華就是上帝, 你 hō in ê 心 oát-tò-tng。38 耶和華 ê 火就降落, 一盡燒伊 ê 燒祭, kap 柴, kap 石, kap 土, koh 燒乾溝內 ê 水。39 眾百姓看見, 就仆 tī 地裡講, 耶和華, 伊是上帝, 耶和華, 伊是上帝。

共同經課 - 2 詩篇九十六篇

1 Lín tiòh òng 耶和華唱新 ê 歌, 全地 lóng tiòh òng 耶和華唱歌。2 Tiòh òng 耶和華唱歌, 祝謝伊 ê 名; 日日傳報伊 ê 救恩。3 Tī 列邦 ê 中間講起伊 ê 榮光; Tī 萬百姓 ê 中間講起伊奇妙 ê 所做。4 因為耶和華最大, 應該受極大 ê o-ló; 伊 tī 眾神明 ê 頂面應該受敬畏。5 因為列邦 ê 上帝 lóng 是虛假; 獨獨耶和華創造 chiah-ê 天。6 Tī 伊 ê 面前有尊貴 kap 威嚴; Tī 伊 ê 聖所有權能 kap 榮光。7 百姓中 ê tak 族 ah, lín tiòh 將權能榮光, 歸 hō 耶和華; 歸 hō 耶和華。8 用伊 ê 名所應該得 tiòh ê 榮光, 歸 hō 耶和華; 帶禮物來入伊 ê 院。9 Tiòh 用聖潔 ê 裝飾敬拜耶和華; 全地 tī 伊 ê 面前 ngiáuh-ngiáuh-chhoah。10 Tī 列邦中 tiòh 講, 耶和華做王, 世界堅固, boē 搖動; 伊 beh 照公平審判萬百姓。11 願天歡喜, 地快樂; 願海 kap 其中所充滿 ê lóng 出大聲; 12 願田園 kap 其中所有 ê lóng 快樂; Hit 時樹林內 ê 樹木 lóng beh tī 耶和華 ê 面前出歡喜 ê 聲; 13 因為伊來 lah, 伊來 beh 審判全地; 伊 beh 照公義審判世界, 照伊 ê 信實審判萬百姓。

共同經課 - 3 加拉太書一章一節~十二節

1 保羅做使徒(m̄是出 tī 人, 也 m̄是 tùi 人, 就是 tùi 耶穌基督 kap hō 伊 tùi 死人中 koh 活 ê 父上帝)2 taⁿ kap 同 tī-teh ê 眾兄弟, phoe 寄 hō 加拉太 chiah-ê 教會; 3 願 lín tùi 父上帝 kap 咱 ê 主耶穌基督得 tiòh 恩典平安; 4 伊為 tiòh 咱 ê 罪獻家己, beh 救咱出現今 pháⁿ ê 世代, 就是照咱 ê 父上帝 ê 旨意; 5 願榮光歸伊到代代。À-bēng。6 前 tī 基督 ê 恩召 lín ê, lín 離開伊到 chiah 緊, 去 thàn 別樣 ê 福音, 是我所奇怪; 7 hit-ê 別 ê m̄是福音, 不過有人攪擾 lín, ài phah 亂基督 ê 福音 nā-tiāⁿ。8 Taⁿ 設使阮, á 是 tùi 天來 ê 天使傳福音 hō lín, 各樣 tī 阮所 bat 傳 hō lín ê, 伊 tiòh 受咒詛。9 親像阮前 bat 講 ê, taⁿ 我 koh 講伊, 若有人傳福音 hō lín, 各樣 tī lín 所 bat 受 ê, 伊 tiòh 受咒詛。10 我 taⁿ 是 teh 對人諂媚 mah? á 是對上帝 ah? Á 是我 teh 求 hō 人歡喜 ah? 我若 iáu-kú ài hō 人歡喜, 就 m̄是基督 ê 奴僕。11 兄弟 ah, 我報 lín 知論我平素所傳 ê 福音, hit-ê m̄是照人 ê 意思。12 因為我未 bat tùi 人受 tiòh, 也無受人教示, 是 tùi 耶穌基督 ê 啓示。

共同經課 - 4 路加福音七章一節~十節

1 耶穌講 hō 百姓聽 ê 話 lóng 明白, 就入迦百農。2 有一個百總所對重奴僕患 tiòh 病, teh-beh 死。3 百總聽見耶穌 ê 事, 就差猶太 ê 長老幾 nā 人, 求伊來救伊 ê 奴僕。4 In 就近耶穌切切求伊講, Chit 人會堪得你 kā 伊行 chit-ê tai-chì; 5 因為伊疼咱 ê 百姓, koh 本身替咱起會堂。6 耶穌 kap in 去。離厝無 joā 遠, 百總差幾 nā ê 朋友就近伊, kā 伊講, 主 ah, m̄-thang 勞煩; 你到我 ê 厝我當 boē 起; 7 我也掠做家己 boē 堪得就近你; 你若講一句話, 我 ê 奴僕就會好。8 因為我也是 hō 人管 ê 人, 也有兵 hō 我管; kā chit-ê 講, 去, 伊就去; kā hit-ê 講, 來, 伊就來; kā 我 ê 奴僕講, 行 án-ni, 伊就行 án-ni。9 耶穌聽見 chiah-ê 話就奇怪伊, oát-tng 身 kā tè 伊 ê 眾人講, 我 kā lín 講, 親像 chit 號 ê 信, 連以色列中我 iáu-bē bat tú-tiòh。10 所差 ê 人 tò 去到厝, 看見奴僕已經好好。